

Anwar diakui antara Jurucakap Terbaik Negara Dunia Ketiga

- Malaysia mengamalkan dasar luar ‘sangat tegas’ yang membolehkannya mengekalkan hubungan dua hala kukuh dengan kuasa besar Barat seperti Amerika Syarikat (AS) dan Eropah tetapi juga dengan negara seperti China

- Forum antarabangsa seperti Mesyuarat Khas WEF ini penting kerana ia membolehkan Anwar mempertegas pendirian negara dalam isu geopolitik serantau di hadapan pemimpin dunia apatah lagi apabila suara Anwar semakin dianggap mewakili suara negara lain



Felo Penyelidik Utama di Institut Islam Hadhari, Universiti Kebangsaan Malaysia (UKM)

Oleh Prof Dr Zaid Ahmad
bhrencana@bh.com.my

Kehadiran buat kali keempat Perdana Menteri, Datuk Seri Anwar Ibrahim di Arab Saudi pada Ahad dan Isnin lalu, menjadi petanda hubungan rapat beliau dengan Putera Mahkota yang juga Perdana Menteri Arab Saudi, Mohammed bin Salman, yang memberi jemputan peribadi itu.

Pada masa sama, kehadiran ini juga menunjukkan keutamaan Arab Saudi khususnya dan Asia Barat amnya dalam dasar luar negara ini, sekali gus pengiktirafan ke atas posisi strategik Anwar sebagai antara pembawa suara utama negara membangun.

Jadual utama Anwar di Arab Saudi adalah menghadiri mesyuarat khas Forum Ekonomi Dunia (WEF) bertemakan Kerjasama Global, Pertumbuhan dan Tenaga untuk Pembangunan di Riyadh dengan beliau dijemput memberikan ucapan di sesi plenari pembukaannya.

Sekali lagi Anwar tidak menghampakan, malah membanggakan rakyat melalui suara lantang beliau di sesi plenari pembukaan Mesyuarat Khas WEF bertemakan Visi Baharu Pembangunan Global yang terus mendapat liputan luas daripada media antarabangsa.

Jika sebelum ini Anwar menempa nama dan menjadi sebutan kerana ucapan beliau menampar negara Barat di atas hipokresi menangani isu Palestin, ucapannya di Mesyuarat Khas WEF pula mendapat perhatian kerana menyelar kuasa besar.

Kuasa besar ekonomi, tegas Anwar, tidak boleh mengarah negara lain, termasuk Malaysia sesuka hati. Mereka perlu mematuhi peraturan negara dan tidak mengenakan apa-apa syarat atau tuntutan memperkecilkan arah serta dasar ekonomi negara.

Di hadapan pemimpin dunia dan perniagaan, Anwar menegaskan ketika Malaysia amat mengalu-alukan pelaburan, namun ia tidak akan mengadatkan prinsip dan tegas dalam pendirian terkait isu geopolitik dunia serta tidak akan tunduk pada provokasi, syarat serta tekanan.

Turut dinyatakan, Malaysia mengamalkan dasar luar ‘sangat tegas’ yang membolehkannya mengekalkan hubungan dua hala kukuh dengan kuasa besar Barat seperti Amerika Syarikat (AS) dan Eropah tetapi juga dengan negara seperti China.

Anwar menjelaskan prospek ekonomi Malaysia tidak akan dipengaruhi peperangan perdagangan antara AS dengan China kerana Malaysia menggunakan pendekatan bijaksana serta mengimbangi

pengaruh mereka dengan tidak membuat provokasi kepada mana-mana pihak.

Tema tidak tunduk kepada arahan kuasa besar ekonomi adalah penting dalam pergolakan dunia sekarang. Dalam ucapannya di hadapan pelajar dan cendekiawan di Universiti Tsinghua, Beijing pada 31 Mac tahun lalu lagi Anwar sudah mula membawa tema ini.

Dalam ucapan itu, Anwar menegaskan tempoh penjajahan dan imperialisme baharu sudah berlalu, sekali gus menjadikan tiada negara boleh mengarah kita. Sebagai negara bebas dan merdeka, Malaysia akan memutuskan apa terbaik untuk kita berdasarkan nilai dan prinsip sendiri.

Tema ini juga Anwar pernah tegaskan dalam sidang media bersama beliau dengan Perdana Menteri Australia, Anthony Albanese, iaitu sekutu tegar AS di Melbourne pada 4 Mac lalu ketika Sidang Kemuncak ASEAN.

"Anwar menegaskan tempoh penjajahan dan imperialisme baharu sudah berlalu, sekali gus menjadikan tiada negara boleh mengarah kita"

Ujar Anwar: “Kami sebuah negara merdeka, kami tidak mahu diarahkan oleh mana-mana pihak. Jika ada mana-mana negara mempunyai masalah dengan China, mereka tidak sepatutnya memaksa negara lain yang tidak mempunyai masalah dengan China untuk mengikut mereka.”

Sebelumnya, dalam temu bual dengan akhbar *Financial Times* pada 25 Februari, Anwar mengkritik gelombang ‘fobia China’ yang semakin meningkat di Barat. Pada masa sama, beliau menafikan dakwaan Naib Presiden AS, Kamala Harris, bahawa Malaysia condong kepada Beijing.

Forum antarabangsa seperti Mesyuarat Khas WEF ini penting kerana ia membolehkan Anwar mempertegas pendirian negara dalam isu geopolitik serantau di hadapan pemimpin dunia apatah lagi apabila suara Anwar semakin dianggap mewakili suara negara lain.

Selain menghadiri Mesyuarat Khas WEF, Anwar juga mengetuai delegasi Malaysia dalam Dialog

Strategi Bersama ASEAN-Majlis Kerjasama Teluk (GCC) dengan beliau mengetengahkan beberapa keutamaan Kepengerusian ASEAN oleh Malaysia bermula tahun depan.

Dalam kesempatan ini, Anwar sekali lagi menegaskan kepentingan kerjasama GCC untuk mempermudah dan melancarkan usaha menyalurkan bantuan kemanusiaan ke Gaza disamping mencari penyelesaian tuntas terhadap konflik Palestin-Israel semakin memburuk.

Ruang yang ada juga diguna oleh Anwar untuk bertukar fikiran dengan pemimpin beberapa negara lain seperti Presiden Rwanda, Paul Kagame; Perdana Menteri Jordan, Bisher Hani Al-Khasawneh; Perdana Menteri Pakistan, Muhammad Shehbaz Sharif; Perdana Menteri Qatar merangkap Menteri Luar, Sheikh Mohammed bin Abdulrahman bin Jassim Al Thani; Menteri Luar Turkiye, Hakan Fidan dan Menteri Kewangan Indonesia, Sri Mulyani Indrawati.

Tidak ketinggalan dalam sesi lawatan begini, Anwar bersama delegasi Malaysia lain juga mengadakan beberapa pertemuan penting bersama pimpinan dunia dan ketua korporat global dalam misi meneroka pelbagai peluang ekonomi dan menarik pelaburan baharu.

Melalui program Dialog Strategi Kebangsaan, Anwar berinteraksi dengan lebih 50 pemimpin industri dan perniagaan pelbagai sektor dari seluruh pelusuk dunia dalam mesyuarat meja bulat membolehkan Malaysia memperkenalkan keutamaan dan inisiatif strategiknya.

Antara pemimpin industri dan perniagaan menyertai dialog ini, syarikat gergasi seperti Samsung, Chevron, BrainBox AI, Cisco Systems, OmniBot.ai, TotalEnergies, Lulu Group International, Deutsche Bank dan Saudi Industrial Development Fund.

Atas penjelasan meyakinkan Anwar mengenai perkembangan Malaysia dan kewujudan peluang perdagangan dan pelaburan luas di sini, ramai pemimpin industri dan perniagaan yang hadir menyatakan minat untuk melabur di Malaysia dalam pelbagai bidang.

Selain itu, Anwar juga bermesyuarat dengan Presiden dan Pengerusi Bank Pembangunan Islam (IsDB), Dr Muhammad Al Jasser; Pengerusi dan Ketua Pegawai Eksekutif syarikat tenaga Perancis, TotalEnergies, Patrick Pouyanne serta Pengerusi ACWA Power, Mohammad A Abunayyan.

Semua ini adalah bukti Anwar adalah Jurucakap Terbaik Malaysia, malah dengan semakin lantangnya suara beliau di dalam forum antarabangsa beliau kini semakin diakui sebagai antara Jurucakap Terbaik Negara Dunia Ketiga.

Semua artikel penulis tamu adalah pendapat peribadi, bukan pendirian rasmi BH